

四庫全書

史部

欽定四庫全書

中州人物考卷七

容城孫竒逢撰

隱逸

岳純孝仲明

仲明固始人宋鄂王七世孫也洪武初徙家於大梁仲明少負清節隱居不仕嘗廬居於墓側者九年有司以孝廉舉朝廷三召不起賜號純孝先生今三召祠故址尚存所著有遺安集

丘布衣鐸

鐸字文振祥符人誠意伯劉基弟子也通儒書兼習醫家言至正末父誠為湖廣儒學提舉鐸侍母留吳越間欲往從之會江右兵起武昌陷二浙繹騷鐸憂懼不知所為乃避地四明暨江南皆歸職方復奉母至南京已而其父亦至自武昌鐸賣藥市中以資養未幾弟鈞為會稽上虞巡檢鐸與父母皆往會稽母疾鐸晝夜泣禱乞以身代及歿哀慟幾絕卜葬鳴鳳山哭曰母生鐸咫

尺不離膝下令歿可委體魄於無人之墟乎乃結廬墓
側朝夕上食如生時當寒夜月黑悲風蕭颯恐母岑寂
輒巡墓號曰鐸在斯鐸在斯其地多虎聞鐸哭聲輒避
去會稽人異之稱為真孝子云先是鐸在四明從祖父
母居汴者八人貧不能自存鐸咸迎養死皆返葬人以
為難其姑適河南匡氏者年十八夫亡誓不再適鐸義
之養其終身其制行峻絕皆類此

張布衣宗魯

宗魯鈞州人四歲失明二十遭亂負母路氏避難其妻
扶掖以行歲飢宗魯賣卜以為養日給不足則令妻採
野蔬以繼之天下既定宗魯奉母還故鄉竭力供養母
卒仍求其前母曹沈吳三氏遺骸合葬焉洪武中禮臣
請表其門文皇聞之曰生事死葬之禮宗魯替者乃能
盡之豈不足為人子勸乎親製詩褒之

王布衣中

中者登封人也家業農母歿廬墓三年未嘗櫛髮易衣

墓側無水浚井四丈餘不得泉中環井再拜籲禱泉水湧出鄉里以為孝感也洪武中旌表文皇嘗謂曰夫學所以涵養其性非性由學而有也世固有樸魯之民不能盡孝以事親而諉曰不知書豈非自誣其性哉亦有讀書學文而質行反不及者此文過之弊也然則中固可嘉其不如中者亦可勉矣朱睦㮮曰余嘗觀御製孝順事實所錄者古今僅二百有七人而宗魯中皆預焉夫二子者亦惟履人之常而已乃蒙二聖褒諭史氏採

錄豈非幸哉巖藪之士事親守身以名行自礪類此而不顯者奚少要之在遇與不遇耳

周布衣炳

炳舞陽人事母焦氏至孝母嘗病篤炳哀號顛天愿以身代遂愈後復病滯下思食獐肉炳四出求之不得是日晚忽有獐入其家即取供母母病復瘥人以為孝感所致宣德間詔修五倫書而炳與魏敏皆與焉敏見第

八卷

皇甫布衣仲和

仲和者睢州人也精天文推步之學文皇北征表忠徹以相仲和以占從師至漠北不見敵上意欲還師召仲和占之曰今日未中敵至上問自何方曰自東南勝負如何曰王師始却終勝召忠徹問之一如仲和之言上怒曰汝二人朋比欺我乎即械之曰今日敵不至二人皆死乃命中人往覘日中不至復召二人占對如初居頃之中人奔告曰敵大至矣時初得安南神鎗一敵直

前即以神鎗擊之二敵繼進復中鎗而斃敵乃按兵不動頃之敵衆齊發上登高望之召總兵譚廣曰東南隅不少却乎廣率精兵舞牌往砍馬足敵稍却已而疾風揚沙兩不相見敵引去上欲乘夜引還二人曰不可明日敵必來輸欵竢其降整師而去明日敵果詣軍門伏曰不意乘輿在是也上以幣賜之乃還正統十四年仲和老矣學士曹鼎與隣時有旨親征北敵鼎急歸召仲和與議曰胡王兩尚書方率百官諫尚可止乎仲和曰

不能止也紮微垣星皆動矣曰事將若何仲和曰以老
夫計之當先治內而後行曰已有旨某監國仲和曰不
如立儲君而後行曰東宮駕幼且未易立也仲和曰恐
終不免於立及上北伐果值土木之難敵騎逼城下城
中人皆哭仲和登高望謂家人曰雲頭不南向乎曰然
曰大將氣至敵將退矣明日楊洪自宣府石亨自大同
將兵入援敵遂遁

胡給事智

智字尚明光山人成化丙戌進士歷戶科給事中數上封事彈劾時宰念親老一旦乞歸既登途忽聞父喪一痛幾絕匍匐抵家而母亦卒智哀毀骨立幾不能生服闋親友勸之任智曰二親既歿更出何為乃扁其堂曰知足自號雲山道人築舍於城南百里外白沙關竟日掩扉靜坐玩易如此者二十有八年丁巳元旦拜天地畢端坐而逝自通籍以來凡俸金租餘悉以贍宗黨之貧者子孫一無所遺其忠孝大節恬退高風真有超乎

流俗者矣

閻郎中倫

倫字天叙息縣人弱冠舉於鄉父歿哀毀骨立及墓遂築室於塋側居之晨夕悲號哀感行路成化戊戌登進士歷官禮部郎中遂堅意以疾乞歸為人清慎端敏不樂仕進優游田里累徵不起士論高之

野史氏曰隱逸不必盡不仕者也陳太丘陶彭澤不以仕而妨其隱胡閻二公入官未久歸里即堅卧不

出而終身之慕二公一致予謂此方是真隱逸

張舉人景純

景純字文粹南陽人成化丙午舉人天資穎敏志向精專凡天文地理性命道德之學無不精究曉悉著書立言名重天下為當時學者所宗王文莊夙負重望每歎服其人未仕而卒

左舉人國璣

國璣字舜齋尉氏人也生而穎異七歲即能詩解音律

讀書日數千言弱冠入京師就姊夫李夢陽學六年業
畢歸補開封郡學生正德十一年舉於鄉其聲稱籍甚
而四方好古之士不遠數百里來訪其至都下諸公卿
大夫又爭迎致之與之游者或累日忘歸獲其片紙隻
字輒藏以為寶顧數竒累試不利嘉靖十四年復試禮
闈其答策問以為今之不治者文過實也文過實處則
行誼不修出則治功不成惟務抗名華世而已其意若
有所指典文者不悅遂擯斥之維時吏部尚書許讚都

御史王廷相杜楠毛伯溫皆欲薦入官辭不就於是歸
汴上考六籍之源委究微言之未絕參諸子之異同達
天人之隱奧居六年頗畢其志所著有經義賦頌碑誄
序記五七言詩各累萬言門人遠近來受業者蓋不可
勝紀十九年都御史富平李宗樞為按察使時嘗欲擬
文待詔故事薦於朝會李以喪免不果年六十一終學
者稱之曰中川先生

官舉人思恕

思恕字子仁光山人嘉靖乙卯舉於鄉喜任俠走馬燕山
有封狼居胥意歸而母彭歿思恕哀毀幾絕結廬墓旁
有白鳥冬笋之祥居廬時百家之言無不涉獵而尤喜
讀易因而有悟遂絕意仕進南之楚與天台耿氏兄弟
焦弱侯楊道南游數年還居天中山房默坐研思至忘
寢食遺友書曰始吾從羣書入茫乎莫得今從靜中討
出端倪方信此心原與天地萬物無兩道其在茲乎士
人熙然宗之所居白沙關山連兩省民俗頑梗乃結社

其間講明正學發揮高皇帝聖諭六言聽者如堵亡何
有四十八人者雞冠佩刀請見曰某等柴山盜魁也習
聞先生之教愿自洗濯以歸聖化奈鼎鑊何言畢環拜
而泣童僕皆走趨思恕從容謂曰律自首者免爾果洗
心來者乎無遺后悔歸試思之詰朝詣社如是者三乃
以聞之邑邑聞之郡太守史桂芳異其事召四十八人
者至如向語太守請於中丞御史待以不死蓋隆慶已
巳間事也明年兩臺疏薦思恕孝友詔下徵用會病卒

從祀鄉賢

野史氏曰士而得志則為帝王師不得志不過家庭孝弟禮讓而止因思之孝弟為仁之本即堯舜之時雍風動亦只完其為孝子為悌弟而已矣士而以隱逸稱者即夫子所謂宗族稱孝鄉黨稱弟者也不於此得力而以幽僻枯寂之人當之豈聖門所謂隱居求志者哉

張明經襲仁

襲仁字體元光州人也七世祖竒字滄洲有破賊功以

參議致仕襲仁少沉潛穎異稍長入州庠其學無所不
窺一以六經為要誠敬為主庸行為先偶寄興詩文則
有天然逸致時喻侍郎時劉給諫繪方為諸生數從之
游後各貴顯襲仁竟以里選不仕講學老焉生平不近
貨色或欲試其守俟醉以妓共閉一室中襲仁鼾睡達
曙惟賦柳色花香爭侑酒澹然一笑却忘情又其下第
詩云床頭金盡無餘物惟有逼人劍氣寒此足以想見
其為人矣以居喪逾禮幾於喪明卒年六十七學者稱

為復菴先生所著有閒居管窺諸儒語抄史綱撮奇藏於家

朱進士長世

長世字興公光州人。生而穎異，性仁孝。崇禎己卯，以弱冠登鄉薦。值中原寇變，父令避亂江東。癸未，成進士。九月丁外艱，明年闖賊陷京師，每夜號不止。河南諸地盡委寇巢，長世間道奉母而南，觀朝政，嘆曰：君父大仇未雪，京師未復，臣子之恥也。過當事，輒正色言之，無何歸。

隱田里以逸民自負寄狂於酒夜半悲號人不解其故
憂憤成疾卒年三十三

龔舉人業新

業新號海旭光州人天啟辛酉舉人當國變業新在江
南嗚咽悲泣者累日病劇且死戒其子曰國勢不可為
為官不可不如歸耕業新居里嘗奮勇抗叛帥左良玉
之師城賴以全自童年事二人以孝聞友愛同氣一時
名士多從游者所著有易解行世其與人心口藹直排

難解紛人稱為魯仲連至利人濟物擲千金如敝屣早年喪妻不忍再娶諸生寓江南者舉業新行實請於學政御史凌公炯准祀社祠

野史氏曰興公海旭俱以鬱憤死身隱矣而心未得逸有主辱臣死之意焉然身非應死之身而特無可行之義非以節死仍以隱死

張舉人民表

附阮太學漢聞

秦布衣鎬

民表字林宗中牟人官保孟男之子也舉萬曆辛卯鄉

試負才能文章落筆即抗古人藏書數萬卷皆手自點
定喜飲及草書飲少許即頽然揮洒如雲烟醒視之自
謂有神助郡邑大夫有以地方利病詢者人諷以葛巾
野服見民表曰吾既以孝廉舉也葛巾野服非孝廉服
也吾不能學衆之矯時方舉賢良方正同里宦於朝者
欲以其名聞民表曰吾既以孝廉舉也倒行逆施吾不
能學衆之偽郡邑諸使徵請恐后民表皆峻辭拒之自
稱旃然漁隱避居郭外蒲津之旁日與友人阮漢聞秦

鎬等蕩漾其中或乘敗車無頂幔一老特牽之朗吟車
中油然自放人無由測其淺深汲引後進孜孜若不逮
以故四方從游者常數十百人壬午闖賊圍汴有勸之
去者民表曰死則死耳奈何以身為衆倡時巡撫高素
重民表日命人視於城上以覘一城安危民表雖耄日
率門人子弟拮据矢石間不少怠以故五閱月士民食
盡卒無叛志比水灌城民表急取所著詩文自負之結
木筏以登求援者多筏重竟沒於水長子允集罵賊死

次子允隼與門人文大士同溺死三子允隼年十一依浮木賴巡按王舟濟得免後門人周亮工撫之成立復其產且徵求民表遺詩梓之

阮漢聞字太冲原浙人家於京師過尉氏愛阮舊里遂家焉所謂詩文鬱鬱卓爍而氣澹韻孤浩浩然時人莫之知也寇劇洛漢聞料賊形勢川谷扼塞圖其畧上之當事會卧疾據床猶劃地作策寇懾漢聞名會掠尉氏城陷罵賊死其著述朱宗正睦梓梓之皆

沒於水門人張昌祚繕其稿避地於南周元亮重為之梓

秦鎬字子京汝陽人有詩名與張民表阮漢聞友善並以曠達稱時號天中三君子云

野史氏曰予兩同林宗赴公車結社蕭寺中每酒後談文賦詩佐以諧語意曠如也余來中州林宗久為地下人與此中人士游徃徃道三子之高恨未覩其著述詳其行事可慨也

理舉人壘和

壘和字寒石西華人好古嗜竒博聞強記身長七尺鬚髯如戟初姓李時闖氛猖熾壘和恥與同姓遂從理學使者考驗不合坐黜名後聞其賢乃許之自是姓理中崇禎壬午鄉試值中原亂避地河朔嘗往來太行百泉間有所題咏輒嗚咽悲憤人莫知其心之所存也甲申後嘗勸大臣奮義旅不遂乃攜家南徙張公鳳翔撫蘇松素知其名薦壘和為監紀推官與俱壘和外柔內剛

有所推問或謀議大事多引經證傳無不允當鳳翔大倚重之不踰年長江不守瑩和從唐藩如閩然性恬退不樂仕進以母在流移轉徙就一官為寄殊非其志也人傳其如閩時授行在職方司主事奉命檄虔兵既至而虔州亂城亦隨陷瑩和從城上自投下死之子習奉祖母以歸疑者猶謂遁海外莫知所終云

張庠生鳳質

鳳質字文冲臨穎諸生也家貧有田八十畝嘗躬耕以

養父母非其力不食時方匱乏親故或有贈遺謝不受
卿士大夫咸敬重之然性褊急不為流俗所喜父惟修
事親孝鳳質故能以孝世其家無子一女十八歲而孀
亦能以孝事鳳質庚子疾革謂其女曰忠孝節義人倫
所重我不愧汝祖汝不愧我女且我頭顱如故而死可
以含笑九原矣尋卒

中州人物考卷七

欽定四庫全書

中州人物考卷八

容城孫奇逢撰

補遺

王待制僕

僕字幼度祥符人元末為國子助教洪武初徵為修撰
四年開科取士僕與典試又命於大本堂授吳王經尋
遷待制同宋濂修輯洪武正韻昭鑒錄諸書八年秋上
閔其老賜致仕歸後以子宏為龍江漉運官忤丞相胡

惟庸寘之理惟庸敗僕來京師授徒自給上忽問僕安在左右告以故上即召見慰勞甚至賜以綺帛仍給舟車送還僕為人質直嚴重年七十餘終於家

秦從龍

從龍字元之洛陽人也仕元累官和林行省左丞改江南行臺侍御史會兵亂避居鎮江丙申王師下金陵遣大將軍達下鎮江上謂達曰鎮江有秦元之者才器老成當詢訪致吾欲見之意達至鎮江物色得之時從龍

有從孫永為達部軍因遣還報上喜甚命兄子文正及朱文忠以白金文綺聘之從龍遂與妻陳氏偕來上親至龍江迎入時上寓王綵帛家因邀同處朝夕訪以時政從龍盡言無隱既而上即元故御史臺為府居從龍西華門外事無大小悉與諮謀密書漆板問答左右皆不知上稱先生而不名每歲從龍生日上與太子皆有贈遺或親至其家與之燕飲禮遇甚厚乙未從龍從子澤死告還鎮江上出郊握手送之是年十二月從龍卒

年七十餘上聞驚悼未幾督兵至鎮江親臨哭之命有司厚卹其家

郭揮僉雲

雲南陽人有勇畧值元季之亂雲起義兵保鄉郡元聞之授以平章事太祖既定中原河南諸郡皆下雲獨守裕州累諭不服志在興復久之勢孤援絕軍敗被執終無一言自分必盡為所守者慎羈不獲遂械至京師上嘉雲忠義命解其縛且慰撫之授以親民之任無何政

舉民服上竒其才擢南陽衛指揮僉事雲築城建衛撫綏軍民咸得其所以疾卒上悼惜親製文祭之于洪特授宣武將軍僉飛熊衛親軍指揮使司事

世尚書家寶

家寶者臨潁人也其先出蒙古姿貌豐整有文武才本姓李初仕元賜姓世至正末以集賢院學士守膠東登萊諸郡洪武元年大將軍下山東遣叅政傅友德取萊陽正月丙子家寶籍車馬之數同僉院王世隆等詣降

上嘉納授大理寺少卿是年八月始設六部以家寶為
禮部侍郎二年陞刑部尚書未幾坐事貶知廬陵召還
授兵馬指揮司副指揮改兩浙運鹽使司同知十五年
進知臨安府秩滿賜致仕還後復召至京師遣賑廣東
興寧長樂二縣飢民所活甚衆二十七年冬卒於家子
寧以軍功授泗州鎮撫

張編修唯

唯者永豐人也寓南陽洪武六年以尚書舉第一是年

上開文華堂於禁中以為儲才地詔擇解額內雋異者
俾肄業其中唯等凡十有七人實與選正月甲寅命題
賦詩詩成稱旨唯等皆擢翰林國史院編修以贊善大
夫宋濂太子正字桂彥良分教之上謂曰昔許魯齋諸
生多為宰輔卿其勉之聽政之暇輒幸堂中取其文親
評優劣命光祿日給酒饌每食皇太子親王迭為之主
唯等侍食左右冬夏賜衣及弓矢鞍馬恩禮甚厚濂輩
雖司啟迪顧諸生皆上所親教不敢以師道自居一日

侍燕閒詢及肄業進益濂對曰無如張唯者因備述其
雋才請錄為弟子員上笑而許之三月上命唯等各歸
展墓皆攝監察御史以行尋還任其時同進者又有祥
符王輝河內李端洛陽張朮禮雖不及唯然侍從車駕
應制被顧問未始異也

答祿修撰與權

與權者永寧人也其先本遼人博學強記善諧謔仕元
為河南北道廉訪司僉事以故官入朝洪武六年為秦

府紀善改監察御史上疏言堯舜禹湯文武相承為道
統孔子顏曾思孟相傳為道學宜崇祀典七年八月復
上疏言王者立始祖之廟又推始祖所自出之帝祀之
於廟故曰禘祭今受命已七年矣而禘祭未舉甚為匪
彝也上皆納之無何出為廣西按察僉事未到官召還
八年三月擢為修撰降典籍轉應奉致仕自稱洛上翁
上親為說辯之文多不載

王布政鈍

鈍字士魯太康人也至正間舉進士授倚民縣尹元亡
隱居教授河津洪武六年徵至京師奏對稱旨除禮部
主事遷吏部總部郎中出為福建左叅議轉右叅政使
麓川回遷浙江左布政使期月以母喪去詔徵詣闕諭
之曰浙江非卿不可治襄事後勉起就任以副倚注之
懷命禮部厚加賻贈鈍懇請終制不許在浙先後十年
四境晏然當是時太祖宵旰圖治藩憲重臣能勝任而
久於其職者惟鈍與雲南布政使張統太祖常稱於朝

以勸庶僚革除間召統為吏部尚書召鈍為戶部尚書
又明年靖難兵至鈍潛出城欲亡為邏卒所執文皇即位
召統與鈍諭曰卿二人久事先皇習知典故今皆老
矣其解職務月給尚書半俸居京師視時政有戾舊制
並向朕直言之無隱庶稱厚望老成之意已而統自經
於部之後堂鈍承制巡視北畿山東事竣乞骸骨上命
以布政致仕鈍既歸鬱鬱不樂遂卒所著有野莊集六
卷刻於家子淪自有傳

郭忠襄資

資字存性武安人也洪武十八年進士改庶吉士授戶部主事以尚書郁新薦選北平左布政使文皇在潛邸時數見知後靖難南下属資居守撫兵輯民給糧餉不乏永樂初論功進戶部尚書仍掌布政使事賞賚視伯已而改刑部尚書復改戶部昭皇即位加太子太師蹇義夏原吉數短於上謂資偏執常格恩澤請罷資上意不然間以語楊士奇曰先皇興義旅及吾昔居守皆得

資力其人亦材且誠今必如二臣請是吾危則任人安
即棄之吾誠不忍士竒對曰故舊無大故不棄此皇上
盛德顧資彊毅人不得干以私但詔勅所蠲租資必責
有司依歲額徵此太過誠如二臣言上曰吾在此復有
原吉與同事彼雖偏執莫能行也已竟罷政賜璽書歸
武安資歸踰月上念之不已又謂士竒曰無使大臣怨
乎不以資其謂我何命戶部給半俸復其家章皇嗣位
詔起資為戶部尚書免朝謁資視事勤雖大風雨不避

僚吏敬憚性木彊意所安者雖刀鎗無能屈所居頽垣
朴舍未嘗治第城府卒之日家無餘貲年七十三追封
湯陰伯謚忠襄子佑以資故仕至戶部主事

魏給事敏

敏字好學鞏縣人洪武二十一年進士授吏科給事中
以母病謁告歸省未至而母卒敏即之墓所哀慟水漿
不入口者五日廬墓三年旦夕衰服哭奠如初喪鄉里
稱其孝二十六年以守臣請甄表其門

羅參政義

義者河南人也革除間謫戍山西時議舉兵伐燕義詣闕上書乞罷兵息民以敦親恩不報及靖難師起義又詣軍門上書其畧曰昔者武王崩成王幼周公乃叔父也而輔相焉管叔流言間王室周公誅之大王聰明英武博通經史今之周公也宜以周公之心為心謹守燕土則天下皆以為周公之聖復生於今日矣又謂古之夷齊以國相讓去隱於首陽山矧聖賢欲成天下之事

必先明逆順之理成敗之勢禍福之機又得天道之宜人心之安然後可書上文皇怒下獄及嗣位即召為戶科給事中尋遷湖廣布政司左叅議復轉陞陝西右叅政

劉太僕進

附孫知府繪

曾孫贊畫黃裳

進字文升光州人景泰四年舉於鄉釋褐為太平府通判聞父卒即日解任比至母溝疾亦篤進日夜侍側衣不解帶湯藥必嘗及母歿水漿不入口者三日既葬遂

廬墓側哀慕食澹毀瘠骨立手植柳柏五百餘本踰年
枝葉繁茂烏鵲馴集不去有司白於朝特賜褒異及免
喪拜太僕少卿卒

繪字子素進之孫少以豪自負舉鄉試第一成進士官
給事中不避權倖後為貴溪黨人論劾出為崇慶知府
尋令致仕歸與楊用修唐應德康德涵何太華為詩酒
之會所著有通論詩文若干卷

黃裳繪之子也十歲隨父入官為京都賦奕奕動人諳

諸邊形勢有用世之志成進士贊畫宋司馬經畧河防
斬獲甚多所著有元符圖藏東征雜記等書行世

孫襄敏賢

賢字舜卿杞縣人也景泰五年舉進士第一授翰林修
撰七年預修寰宇通志成轉侍講天順初為會試同考
未幾改左中允侍東宮講讀三年考最推恩封父如其
官及母妻俱授安人純皇即位遷太常少卿兼侍讀成
化六年乞歸省上念侍從舊勞特命乘傳且有金綺寶

錙之賜滿三月還朝會修睿皇實錄成進太常卿兼侍
讀學士十四年以家艱還盡以遺產畀其二弟服除以
學士命掌翰林院事時皇儲未建乃上疏請且引疾乞
休示無希覬意章並上上皆允之皇子立是為悼恭太
子賢歸六年卒年五十四贈禮部左侍郎兼翰林學士
謚襄敏所著有鳴盛集若干卷

劉尚書璟

璟字德輝鄆陵人為四川叅政漢川軍叛殺人璟擒其

首惡亂遂定改山西宗室抽刀截耳以脅御史衆皆走
避璟挺身入諭以禮法引臂出之血浣其衣聞者壯之
在刑曹廷臣會鞠逆瑾有微斥瑾者輒反唇璟厲聲斥
曰朝廷有大法在尚爾私懟耶次訊諸奸惟允子訢正
德丁丑進士初授寧國府推官武廟南幸繫詔獄後歷
官工刑二部尚書曾孫貴卿監察御史

胡副使賓

賓字汝觀光州人嘉靖壬辰進士放榜後以母病亟歸

不與殿試為兵科時論列臨難避事不忠之大臣三人
皆罷譴畿內飢荒疏請和糴發粟十數萬全活甚衆因
大計劾山東布政某時宰庇之尋推撫遼東賓歷詆其
罪語侵時宰謫判亳州賓矢志勿欺絕無倚附好德如
飴聞善即拜海內士樂與之交

蔡知縣光

附于尚書毅中

光字汝謙光山人年十三從其父與王文成論良知力
行不合從旁曰能行詎非知也文成異之嘉靖己酉舉

於鄉授江華令以卓異調寧遠乞終養其學以靜而入以敬而存無愧西山文肅之裔一日微疾衣冠拜家廟朗吟而逝邑人為立默齋先生祠祀之子毅中

毅中字中山萬曆辛丑進士由庶吉士官禮部侍郎署國子監祭酒時璫賢柄政楊漣疏二十四罪請誅忠賢上不報毅中遂四疏請告命留總裁實錄后兼侍讀學士致政崇禎三年進呈六經註疏上獎其研心實學卒

贈禮部尚書

朱藩王端清載堦

鄭藩世子以父恭王原係四支長支次支無嗣三支盟
津王得罪庶母父東垣王以四支襲至恭王載堦上疏
仍讓三支不允七疏懇辭乃允其請以世子終謚端清
奉旨建坊著有天文樂律諸書考定雅樂審音制器生
時以秘篋貽子孫云俟有急難啟視甲申闖寇遣偽將
軍劉方亮陷郡城開篋有借問將軍誰姓劉之句蓋前
知云

朱宗正睦榘

睦榘字灌甫周藩鎮平恭靖王四世孫高祖七世孫也
嘉靖中以學行聞為周藩宗正早歲講業水竹居之西
學者稱為西亭先生生而端穎李夢陽一見竒之受經
學六經悉通大義讀漢以來諸家經解所發明多得之
於世儒箋註之外尤精於易春秋博古通今而文復雅
馴有至性事父母甚備居喪不御內寢先世遺產盡予
諸弟自奉儉樸若儒生卒年七十所著有陂上集五經

稽疑授經圖河南通志文獻志中州人物志若干卷第
睦棻號西園為之編校錄行能承允志云

李修撰叔允

叔允字叔允鈞州人洪武三年任國子博士尋入東宮
兼伴讀六年奉詔纂修昭鑒錄擢修撰八年修洪武正
韻亦與焉年七十以老乞歸許之賜白金百兩綺衣一
襲皇太子親王又各賜錢萬八千兼以酒饌寵賚至渥
縉紳榮之

鄭中丞二陽

二陽號潛菴鄆陵人萬曆己未進士歷官至巡撫由德安推官行取入京璫賢私人嗾以劾楊漣居家不法事可立登要津二陽謂楊公居家清謹實無過遂授南工部主事備兵淮揚鹽漕軍門大璫楊顯名聲勢赫灼欲府道以屬禮見二陽謂兵道不與鹽筴且勅書無提衡監司語屹不為動平生篤於宗親欲做行文正公義田事晚好竺典

陳御史士舉

士舉衛輝人洪武三年有司以儒士舉時四方被薦者頗衆詔禮部復試之其中選者士舉暨桐廬魏潛等凡十九人會入謝太史奏文星見上喜士舉等皆擢監察御史

邢編修恭

恭字克敬鄭州人宣德二年進士授翰林院編修母歿自京徒步歸不入城府既塋結廬墓側屢有祥應有司

言狀詔特旌焉

柳揮同宗

宗鹿邑人永樂三年以都指揮同知從征交趾與呂毅同死於難

郭御史欽

欽字子敬獲嘉人永樂甲申進士授行人擢御史嚴毅清簡吏民憚服其鑿呂梁監獲軍皆以風力見稱

馬恭襄昂

昂字景高祥符人慷慨有志節永樂癸卯舉人授鴻臚寺序班擢御史累遷兵部尚書天順辛巳曹欽反變起倉卒都御史寇深恭順侯吳瑾俱遇害昂率官軍圍欽等於其宅盡誅之進太子少保年七十致仕卒謚恭襄

李尚書遜學

遜學字希賢上蔡人成化丁未進士歷官直閣禮部尚書有作人厲俗之功極被恩遇賜賚甚厚

李僉事瀛

濂字川父祥符人鄉試第一成進士李獻吉締為忘年交見嵩渚集祥符文獻志

杜僉都柵

柵字子木臨潁人正德辛巳進士與何景明李夢陽王廷相崔銑等並稱有研崗集行世

朱恭節冠

冠字仲瞻固始人正德戊辰進士按兩淮以清正著聲流賊陷固始屠其家聞變慟絕回籍不仕終身服喪嘉

靖元年起江西僉事不就卒謚恭節孫楷甲辰進士令
臨晉有循聲授御史簡靜持大體

呂知州文

文延津人正統甲子舉人初授江潛令後守沔陽及朔
二州冰檠之操終始不渝入覲吏部考為天下清官第
一書名部門以勵士風

張太常漢卿

漢卿字元傑儀封人正德辛未進士嘉靖初為戶科都

給事中時議大禮漢卿抗疏謂上當嗣孝皇疏三上皆
伏哭於午門外上怒杖於庭罷歸卒於家隆慶中追贈
太常少卿

扶侍郎克儉

克儉光山人官刑部侍郎以直著有講學功

張都御史祉

祉固始人嘉靖戊戌進士歷官陝西巡撫有築城功人
稱其守郡籌邊似尹晉陽持身約己似婁師德

張副使景

景字光啟汝陽人嘉靖癸未進士授御史出按陝西疏
陳邊務十事薦呂涇野於朝按浙建天真書院祀王文
成買田數百畝給肄業諸士巡視京營絕請托與嚴世
蕃相左遂出為漢中副使尋罷歸所著有泰華集六卷

喻侍郎時

時字中甫光州人嘉靖癸未進士為御史劾相嵩險而
獐久之且亂天下疏上即素服候訊北闕上心動於時

之言而嵩難卒去因勿究時有邊功

劉主事訓

訓汝陽人嘉靖壬辰進士為溫州推官有權貴子怙勢恣睢從惡少數十輩橫行州里漁色固利欲奪友人妻不得乃毒殺友人郡守莫敢問託病推印務於訓訓故以好延至廳密勅訟者至獄成即杖殺之置惡少於法一郡稱快權貴陽令陞戶部主事即挂冠歸

陳給事耀文

耀文字晦伯確山縣人幼稱神童嘉靖庚戌進士為給事中感時觸忌忤時相謫魏縣丞卒年八十二博極羣書著述甚富有天中記正揚學林諸書

張巡撫九一

九一字助甫新蔡人嘉靖癸丑進士在吏部與王世貞交善會世貞父得罪分宜下獄九一數過問坐是出外且謫後巡撫寧夏有功受金幣之賜

趙尚書賢

賢字良弼汝陽人嘉靖丙辰進士官戶部兩司錢穀風
清弊絕出守荊州攝服大盜楊勝德黃中輩地方以寧
撫楚時江陵東國常繩其親識僕從及其奪情罪言者
又移書規諫稱為知已然卒為所波及後子祖壽為安
慶守上章白狀詔復原官准致仕

宋冢宰纁

纁號栗亭商邱人嘉靖己未進士歷官吏部尚書是時
銓部之權久歸內閣纁風節自持矯矯有為惜未竟其

施

陳郎中璋

璋字公獻光州人七歲舉奇童弱冠登第孝友貞介官
司寇郎所在有功績緣不阿時相未蒙顯陟著述甚富
王世貞李攀龍等甚服之有星湖漫稿葆光堂別集陳
氏世範太平事畧行於世

王侍郎教

教字庸之祥符人嘉靖二年進士及第授編修嘗三為

會試考官衡鑒精明為時所稱累遷國子監祭酒上薛
文清瑄從祀議會慎簡宮僚以祭酒兼右春坊右諭德
而祭酒兼春坊自教始後遷南兵部侍郎卒有文集若
干卷

梁給事問孟

問孟新鄉人嘉靖乙丑進士歷兵科都給事中事莊皇
特䟽改折本色種馬撫寧夏收寺逆兵柄引河開田歲
獲儲四萬石捐貲建學宮號房贈副都御史

蘇教授時靈

時靈號仁軒汲縣人醇謹著聲以明經教授開封士服其教文風為之大振

靳滋昂

滋昂尉氏人字昂昂別號笨伯尚書於中長子工書弱冠辭廩餼買大驪山薙茅築舍起仙岩別墅居焉後遇流賊交訐四方投居者存活以萬計昂清心味道著有黃庭心印諸解獨撰龍沙一線一卷世咸崇為玄門直

指壽七十三書訣辭曰泰山頽兮吾安所適陰陽疣贅
死機元活我將棲遲天地為宅端坐默默如平常屬續
體柔不僵人咸異為尸解云

張光祿同德

同德河南人任工科給事中萬曆二十三年論定國公
徐文璧以代祭加銜太師革職為民冢宰張問達總憲
鄒元標題覆贈光祿少卿

李侍郎若星

若星息縣人兵部侍郎死難貴州

費光祿必具

必具河南人南禮科給事中萬曆二十四年因申救耿
隨龍落職張問達等題贈光祿少卿

張參政尚明

尚明字湛若太康人萬曆己丑進士官陝西參政官評
輿論稱之鄉人為立剛方正直碑

吳侍郎阿衡

阿衡裕州人萬曆己未進士巡按浙江大振紀綱貪吏
斂跡歷官兵部侍郎總督薊遼以失墻子路殉難死

王叅議則古

則古字維則禹州人萬曆癸丑進士為兵部主事力薦
馬世龍為遼將當道疾之中以察典起工部主事調兵
部時魏璫專政指東林為邪黨則古從趙南星遊株連
削奪璫敗起南禮部主事歷員外郎中冀北叅議

余知府若南

若南號郁六汲縣人乙卯舉人刑部員外遷龍安知府
有政績

喬尚書允升

允升字吉甫孟津人萬曆壬辰進士累官刑部尚書崇
禎初魏璫一案允升甄別雖首輔不少假詞臣文震孟
經筵進講引允升為喻曰以道事君在廷大臣惟喬允
升為無愧焉

汪侍郎燁

卷八
輝號柱河嵩縣人萬曆辛丑進士以庶吉士累官禮部侍郎會魏璫生祠徧天下有欲得輝文記其事者不可即日削奪歸里璫敗詔起原官

吳布政三樂

三樂洛陽人進士由庶吉士歷湖廣四川提學山西左布政序何文定瑋集能發明其記

李莊靖宗延

宗延字景詰汝陽人進士授御史同御史李本固給事

費必興建冊立東宮削籍歸光宗即位特召大理寺卿
晉吏部尚書謚莊靖

王知縣士俊

士俊祥符人崇禎辛未進士官知縣壬午闖寇圍汴決
黃河灌城士俊見水入勢不能支遂墜樓投水死子繼
之妻與母又繼之汴人稱其行誼惜之

周尚書士樸

士樸字纘唐商丘人以進士歷諫議官至工部尚書常

抗論內監李實忤魏忠賢又折辛璫張彝憲不肯與共
坐最后以爭駙馬齊贊元事侃侃天子之前挂冠去

彭御史鯤化

鯤化字飛仲汝陽人進士為御史魏璫煽虐吏部郎蘇
繼歐忤璫下獄鯤化餉之削籍歸

劉苑馬濟

濟

缺

人官至苑馬司少卿英宗時以廬墓旌表

趙御史時中

時中

缺

人官至監察御史英宗時以廬墓旌表

張叅政文佐

文佐

缺

人官至布政司叅政英宗時以廬墓旌表

續補

姬知府敏

敏孟津人通儒書明律筭德行純備節操過人洪武中以材幹舉授西安知府

于知府潛

潛字彥昭鄆陵人少倜儻有志操永樂初為建昌知府性廉介不避權勢待吏卒甚嚴撫黎庶以恩不踰年政平訟理百廢俱興郡人懷之

元吏部本

本武陟人父子英仕元為河陽尹本至正間進士除邠州判官攝褒城安塞三縣尹俱有治績洪武初有司以明經舉授懷慶府學教授遷察言司令史官至吏部郎中致仕

樊布政鎮

鎮考城人賦性剛直博通經史洪武中登進士第授監察御史振揚風紀有能聲歷官山西右布政使所至廉

幹勤敏大得時譽

安參政德

德汝州人幼警敏涉獵經史習詞賦舉元進士隱居授
徒洪武初郡守舉為州學訓導兵燹之餘家無藏書德
手錄以授生徒後以明經徵起入對稱善擢湖廣左叅
政

高大理敏

敏安陽人由太學生擢禮科給事中處事公正官至大

理寺左少卿

張侍郎春

春許州人才器淵宏洪武中由國子生推刑部郎中陞都察院右僉都御史永樂中入為戶部右侍郎

郎知府敏

敏濟源人洪武初以國子生授御史擢饒州知府樂平有詣闕妄懇大姓千餘謀逆者詔統兵捕之敏自往察視耕牧如常兼得懇者以假貸不得怨諸大姓故重誣

之奏聞詔釋之乃誅妄愬者

凌知縣文質

文質固始人洪武間知趙城縣重建縣治學校功成而民不擾

劉尚書達

達項城人性寡默善書翰家世以忠孝相承鄉邦稱之洪武間以人材舉薦累官至刑部尚書

劉長史醇

醇祥符人能詩善屬文洪武末以儒士起家累官周府長史致仕年九十餘號菊莊先生有菊莊集若干卷

武叅議友諒

友諒偃師人少貧有才行敏於問學洪武中以賢士舉授湖廣左叅議

解都御史敏

敏陽武人性剛勁務學明敏以古人自期洪武中進士積官浙江按察使政聲著聞超拜右都御史

趙尚書好德

好德字秉彛汝陽人博學多才器宇宏敞有志民事洪武初以儒士扈從車駕渡江授陝州同知尋遷安慶知府召為吏部尚書改陝西行中書省叅知政事

趙尚書瑁

瑁宜陽人喜讀書博學洽聞洪武間由儒士任河南府學訓導陞廣東瓊州知府再遷吏部尚書

夏尚書恕

卷八
恕洛陽人謙和有智畧居鄉閭以德行稱洪武間由賢
良舉累官刑部尚書

宋布政賓

賓洛陽人性剛直遇事果決洪武間為太學生才能為
衆所推授清紀郎遷真定知府為政有方吏民信服秩
滿陞陝西右布政使

宋副使文

文祥符人性資醇厚學行兼備洪武中河南叅政鄭居

貞以隱士薦送京師授山西按察司副使在任廉能著
稱風紀肅然

華布政士瞻

士瞻偃師人性淳篤節操堅確洪武初以賢士舉授湖
廣布政使

尚布政迪

迪獲嘉人儀度殊常才識越人洪武中由太學生歷官
刑部郎中永樂中陞四川左布政使

孟布政禎

禎息縣人聰敏力學處事知大體洪武中以儒士舉累
官四川左布政使

岳布政岫

岫密縣人嗜學博通經史容貌魁偉氣岸卓越洪武中
以人材舉累官至雲南右布政使

石侍郎璞

與四卷石璞異

璞字仲玉陝州人好讀書不事華靡以吟咏自娛樂洪

武間以儒士薦授教職後陞戶部侍郎

元知府亮

亮湯陰人永樂進士景泰初知襄陽府誠心蒞政深知民隱廉而不苛寬而有制十縣之民感思懷德從容樽俎聽事寂然

焦布政宏

宏字克明葉縣人永樂進士累官戶部侍郎為御史時嘗按貴州平反疑獄全活者數百人及為布政小民咸

被其澤弟寬亦舉進士歷官叅政

刁知府鵬

鵬祥符人永樂中知荊州府賦性耿介立志清苦蒞任九年門無私謁囊無贏帛凡所設施調度卓有條理且勞來安集政教大行軍民稱頌

曹知州銘

銘新野人以進士授香河知縣上䟽建言宋儒胡瑗等八人皆有功道學當從祀孔子廟廷上賜允行之尋陞

儋州知州卒祀鄉賢祠

曹府尹庭訓

庭訓靈寶人性資聰敏處事果決鄉里曲直悉求判正
洪武間以人材薦授應天府尹

名指揮義

義祥符人永樂八年征迤北有功陞都指揮使

侯布政軌

軌安陽人登永樂乙未進士拜監察御史有能聲歷遷

福建按察司副使復陞四川左布政使政績著聞

遠知府志

志遂平人永樂中以刑部員外調同知永昌府事明習政典決事如流勢豪斂避

夏知府忠

忠字思誠睢州人宣德初累知大名府忠厚廉平修學勵俗吏士承之不威而化焉宣德五年抗疏歸

岳知府濬

濬字文玉祥符人宣德進士歷任湖州府知府博學善辭令襟懷宏廓民樂其寬

婁都御史良

良字至善河南人正統進士授刑部主事己巳從駕北狩酋帥脅以刃辭色益厲帥重其節釋之歷官右副都御史

凍知縣泰

泰睢州人正統間知利津縣廉明仁恕振士風革吏弊

百姓懷服至今稱為能吏

戴布政珙

珙字廷璧河南澠池人景泰甲戌進士任御史天順三年按治真定存心忠厚斷獄詳明吏民至今懷仰歷布政使

鄧主事存德

存德新鄭人成化進士任刑部主事有右善世道堅盜賣度牒存德鞠實治罪尚書董方比之欲緩其事存德

奏聞方上言存德率意妄為遂詔存德道堅俱下獄存
德降調道堅釋放給事中雷澤等上言當宥存德而罪
道堅不報

陰主事盈

盈字克復汝陽人弘治己未進士正德初任知縣臨政
威嚴聽訟明決強橫屏跡善良安業凡賞罰期會信義
勿墜下車未及半載陞主事去

關知府清

清河南人弘治舉人知平涼府天性純孝為政務本愛民

高光祿尚賢

尚賢字大賓鈞州人正德庚午鄉試第一丁丑進士累官山東提學僉事以身為教士習翕然向風遷光祿少卿子捷都御史拱大學士

商同知賓

賓洛陽人以吏科給事中改知銅陵疏請聽民開墾荒

田民無不業者任滿民請留進府同知仍知縣事

任都御史洛

洛字仲伊鈞州人進士正德初知桐鄉明敏公廉吏民敬愛之居三年以憂去行裝蕭然後遷監察御史歷都御史

察同知童

童陳州人正德中貢士任朝城知縣志稱其才具通敏政多善舉遷府同知

樊僉事鵬

鵬字少南信陽人嘉靖丙戌進士官至按察僉事常師何仲默為詩文有聲稱所著有樊氏集十卷

秋知縣逢慶

逢慶河南汝寧人舉人嘉靖三十年任遂寧知縣嚴於

馭吏門禁肅然

孟府尹淮

淮字豫川祥符人嘉靖戊戌進士歷官都御史巡撫山

西改應天府尹性抗直忤時歸素好詩歌有入蜀稿

戴副使冠

冠字仲鵬號邃谷信陽州人正德戊辰進士戶部主事
言事謫驛丞清修自勵簡靜以居素位而行累無怨尤
歷山東提學副使師事何大復仲默有時名其詩聲調
宏邁語意勁峭慷慨激烈有古國士風

擬入無傳

韓政睢州人東平侯見吾學編開國異姓諸侯傳

楊本中牟人鎮撫見吾學編遜國臣記

劉原弼字良輔扶溝人官主事

楊應龍杞縣人教授

王資杞縣人指揮

劉伸杞縣人

金有聲河南人侍郎

以上五人俱遜國

樊鵬字士南信陽人

陸東字道函大梁人

李蓑字子由內鄉人弟蔭

見叙天中記

李宗木字繼仁蓑之父有杏

缺集

王三善永城人號彭伯

丁魁楚字光三永城人

熊緯字子文號南坡光山人

李時春光州人

熊駿固始人

劉墉光山人 國初創法

劉可法商城人執法而清

范守己 缺 人有郁龍子集

田維庸 缺 人郎中

常自裕鄆陵人給事中

李汝華字茂夫睢州人謚恭敏

李孟暘字時雍睢州人尚書

周寧睢州人

王慕祥字承休睢州人

孔貞字道原杞縣人大理

秦夢熊杞縣人萬曆甲午舉人為戶部郎中督餉寧武
殉難卹贈太常寺少卿

練國事字任鴻永城人司馬

葉廷桂字青來商丘人司馬

袁可立字禮卿睢州人司馬

劉淮睢州人叅政

薛蕙字君采籍亳州偃師人所著有約言五經雜說

劉連字石孔鄆陵人



中州人物考卷八